

Segun Antoni Gario, Tecla Kelly kier a causa sensacionalismo

"Si tabata tin union entre musiconan, hamas mi lo tabata para den e situacion aki"

ORANJESTAD (AAN): Den e dianan aki, Antoni Gario tabata den un imagen no mucho positivo pa su persona. Por e scucha tambe cu ya caba SAC a dicidi kico lo bay pasa cu Antoni Gario pa loke ta e proximo Festival di Calypso y Road March na 2009.

Den entrevista cu e musico, DIARIO a puntre con a bay despues cu el a sinta y a

yega un acuerdo cu Mighty Campo y Mijler Lourens.

Segun Gario, un cos cu el a gusta ta e madurez cu Sr. Lourens y cu Sr. Oliva a demostra cu nan tin y e comprension cu nan a duna na e contexto di Calypso.

Den e caso aki, a bisa, tur dos partido ta di acuerdo cu e situacion y a señala cu e no tabata tin ningun problema cune for di cuminzamento.


Loke si nan tin cu wak cu SAC ta si nan por sanea y drecha un par di cos cu no ta bayendo bon, segun e musiconan cu SAC.

Pa loke ta e declaracion di Tecla Kelly, a bisa cu Sra Kelly no tin ningun derecho di prohibi su persona di participa otro aña y cu kizas el a papia esey pa causa sensacion. "Na Aruba nos ta y no na Cuba y esey no por".

Pa Carnaval 2008, a expresa cu e lo desea pa varios locutor y DJs bira un tiki mas serio y profesional den

nan trabao. E DJsnan ta causante di hopi problema na Aruba caminda nan ta escala e problemanan pa falta di dinamismo y profesionalismo.

Encuanto e posible expresionnan cu e por a haci, a señala cu esnan cu ta compronde Calypso sa cu den Calypso tin espacio pa tur e sorto di cosnan aki. E chermanan di Calypso aki ta algo normal den pueblonan caribense y cu kizas awendia Aruba no ta corda, pero tur gran cantante di Calypso



aki na Aruba a yega di canta algo di un otro cantante, di un instancia of di gobierno. SAC no ta mas cu gobierno.

"Pa decadas caba nos ta cantando cosnan negativo di gobierno, delaster un ministro cu a sinta y nunca a haya e reaccion aki". A agrega cu den e caso aki e no sa si SAC ta pretende di ta mas cu gobierno, pero no ta husto pa SAC bin cu decisionnan asina awe.

Antoni Gario a manifesta cu te ainda e no a haya un comunicado oficial ni ningun documento ainda. Tur cos ta sensacionalismo, den su opinion.

El a haya un papel cu e mester rectifica y Tony Mingo tambe, pa loke e no ta compronde pakico Sr. Mingo tambe a haya e documento aki pasobra e ta esun cu a expresa algo negativo di SAC di locual e ta sinti y cu otronan tambe ta sinti pero cu otronan ta keda keto pe.

A finaliza bisando cu e ta para responsable pa cada acto. Sinembargo a enfatiza cu tur e cosnan ta pasa door cu no tin union entre e musiconan. "Si tabata tin union entre musiconan, hamas mi lo tabata para den e situacion aki".